

Diuzmae Youq Gyang Lwgfwngz Siuq Ok Gij Ndwenggoenz Gyaundeidei Ranzmyauz

—Geiq Boux Swnjcienz Daiqbiujsingq Aen Hanghmoeg Feihyiz Gaep Swcigih Lij Canyongh



▲Lij Canyongh son lauxsae Sinhcouh Daihsam Siujyoz baenzlawz euh labnyumx.

Lij Canyongh, boux mehmbwk bingzciengz Myauzcuz Lungzlinz Gak Cuz Swciyen ndeu, baengh miz yiedcingz, aeu gij maesei caetsaek Myauzcuz siuq hwnj baengzva bae, siuq ok geu dem geu buhvaq minzcuz gyaundeidei, lumj miz sengmingh nei, daengxheij gyaundeidei cungj deng lwgfwngz de suglien gaeunguenj dwk. Labnyumx, siuqva, daemj baengzndaij doenghgij dinfwngz de gaemdawz neix, neiyungz lai dangqmaz, miz lizsij vwnzva Myauzcuz cien bi, mbouj gvaqmauh saekdi siuq ok gij gwndaen ngoenznaengz, gij hozdung guhhong, gij lijyiz fungsug caeuq gij saenqyiengj beixnuengx Myauzcuz Lungzlinz lo.

Yahdaiqcoj Lij Canyongh mingz heuhguh Vangz Yez. Aenvih daih haenx mehmbwk Myauzcuz mbouj rox saw, ndigah gyoengqde cijndaej hag daemjroq, siuqva, labnyumx, daihdaih doxcienz. Daxmeh Lij Canyongh mingz heuhguh Yangz Canghsiu, yienzlaiz youq Mbanjnuzgyah Cunh Sajyij Yienh Anhlungz Sengj Gveicouh, doeklaeng haq bae Ranzlij Mbanjlungzsaj Cunh Lunglaiz Cin Yahcah Lungzlinz Guengjsae. Daih coj Ranzlij dwg vunz Bwzmyauz, daxbuz dwg vunz Cinghsuijmyauz, daxmeh dwg vunz Hungzdouzmyauz, gap baenz le ranz comz vunz Bwzmyauz, vunz Cinghsuijmyauz, vunz Hungzdouzmyauz youq doxcaez ndeu. Neix hix hawj Lij Canyongh hag rox le gij dinfwngz siuqva Myauzcuz sam cungj neix. Caemhcaiq, Lij Canyongh daj iq couh

hainduj maij siuqva, ndaej daxbuz caeuq daxmeh oenquyem, de hag rox le haujlai dinfwngz siuqva cienzdoengj Myauzcuz.

Mwh lij oi, de yawjraen haujlai bandoih okrog bae dajgoeng ra cienz, de caemh naemj bae haujlai baez gvaq, hoeng, vihliux hawj gij dinfwngz Myauzcuz ndaej swnjcienz roengzbae, de caeuq doenghbaez doxlumj, youq seiz ndaejhoengq, haenqrengz hag siuqva, de couhdwg yienghneix baengh song faj fwngzmbaeu siuqva, siuq aen loqsiengj bonjfaenh, gangjok gij siengjmuengh gyaundeidei ciuhvunz bonjfaenh.

Hungzdouzmyauz miz haujlai cungj siuq, lumjbaenz siuqcihcib, siuqcihmij, siuqbaengzvaj…… Doenghgij neix cungj dwg gij fuengfap siuqva Myauzcuz ciuhgeq cienz roengzdaej. Hungzdouzmyauz maij yungh saek ndinggeq guh saekdaez, saekloeg, saekhenj, saeko doenghgij saek neix dwg saek bengxdaiq, caemhcaiq dap saek iugouz itdingh aeu youh moq youh rongh, hawj lwgsau Myauzcuz daenj hwnj ndang bae couh lumj dujva nei gyaundeidei.

Lij Canyongh naez: “Gij siuq Myauzcuz daegbied gangigouz doxdaengh, lai yiengh, ronghsien gyaundeidei, cujau yungh daej sieng hwnj hozbuh, daeuxbuh, genbuh, dinvunj buhvaq bae, caemh ndaej aeu daej siuq guh daehbeq, daehcienz doenghgij doxgaiq neix. Geu buhgwnz gyaqcienz baengz bingzciengz ndeu,

geu vunj yungh baengzndaij bingzciengz guh baenz ndeu, baez sieng hwnj gij siuq Myauzcuz, couh bienq ndaej ronghsien lwenqda, gyaqcienz hwnj baenz bak boix.”

Cawz siuqva le, Lij Canyongh lij rox guh baengzndaij, labnyumx doenghgij dinfwngz cienzdoengj Myauzcuz neix dem. Guh baengzndaij dwg gij hongfwngz ceiq gihbwnj. Daih’it aeu ndaem ndaij, ndwengeih hainduj ndaem. Ndwenaet daengz ndwenbet sou naeng ndaij, guh baenz mae’ndaij. Ginggvaq haujlai bouh cijndaej cang hwnj aensaj bae, gatsat daemj baenz baengzndaij. Labnyumx dwg yungh gij baengzndaij daemj baenz haenx veh okdaej, yungh gaiq benjfaex ndeu hanj bingz le, aeu roengz aen laepiq bae, dwk bingz yungh danqfeiz menhmenh cawj gienghlab baenz, liux le cij yungh bitlab baez bit baez bit diemj hwnjbae, lab diemj liux le cijndaej aeu roengz ndaw aen ganglab bae nyumx. Nyumx caet baez le, yungh raemx cawj hawj gienghlab duet okdaej, giz saekhou couhdwg diemjlab, giz saek ndaem’o couhdwg romj.

Youq ndaw Aen Gunghswh Buhvaq Minzcuz Lij Canyongh diegyouq yienhsingz Lungzlinz haenx, baij miz haujlai huq Lij Canyongh guh, gij siuq fungsug ndwenngoenz Myauzcuz, buhvaq minzcuz, yiengh-yiengh gyaqciq gyaundeidei, yawj ndaej ok gij dinfwngz de ak dangqmaz, hawj vunz nyaenx mbouj ndaej haenh naeuz gwnz daiz faen cung ndeu, laj daiz cib bi goengrengz. Dauqyawj diuzloh ganhoj 30 lai bi, gij dinfwngz

cienzdoengj Myauzcuz hawj Lij Canyongh roengzsim haeuyjinx, vih de haenqrengz buekguh, hawj de daj meh guhsuq bingzciengz youq Mbanjmyauz ndaw rungh ndaw bya okseng ndeu menhmenh majhung baenz bouswnjcienz gij siuq Myauzcuz, bousbaujhoh huqbauj minzcuz.

Bi 2014 ndwen 9 《Siuq Maesei Labnyumx Benhmyauz》《Siuq Dahsau Myauzcuz Bwzmyauz》《Ndangdaenj Siuqva Su’mayauz》gij cozbij labnyumx, siuqva Lij Canyongh neix faenbied aeundaen aen ciengjdoengz “ciengj hongmbwn Bazgvei”, ciengj cozbij maenhndei, ciengjdoengz; bi 2015 youq ndaw doxdax buhvaq ceiq gyaundeidei ciet diuqbo Myauzcuz Lungzlinz, aeundaen “aen ciengjgim buhvaq cienzdoengj ceiq gyaundeidei” Hungzdouzmyauz, “aen ciengjmaenhndei buhvaq cauhoq” Bwzmyauz; bi 2017 gij buhvaq Myauzcuz de cau-huh haenx aeundaen aen ciengjgaenz “ciengj hongmbwn Bazgvei” aen langhbaej cozbij gunghyi meijsuz Guengjsae; bi 2018 gij cozbij labnyumx, siuqva de aeundaen mingz daihsam aen langhbaej cozbij minzcuz Gvangjsih Yisuz Yozyen.

Dangguh bouswnjcienz gij ndangdaenj cienzdoengj Myauzcuz gaep swcigih feihvuzciz vwnzva yizcanj, Lij Canyongh roxyiuj diuzrap gwnz mbaq hungnaek, de maqmuengh gij siuq Myauzcuz miz geij cien bi lizsij haenx youq Mbanjmyauz Lungzlinz daihdaih doxcienz, ronghsag lwenqda, hawj daihlaeng dawzyinx.

(Veiz Ginyuz raiz Dahdingz hoiz)



▲Lauxsae hagseng Sinhcouh Daihsam Siujyoz yawjngonz gij huq labnyumx Lij Canyongh.